

## فريق التفريغ بموقع الطريق إلى الله

يقدم

المعهد القرآني الدعوي

العنكبوت 15

(باللهجة المصرية)

لفضيلة الشيخ: د/حازم شومان

رابط المادة: al rabet



الحمد لله وكفي وصلاة وسلاما علي عباده الذين اصطفى اللهم لك الحمد كله ولك الملك كله وببيدك الخير كله واليك يرجع الامر كله اللهم صل علي عبدك ونبيك محمد صل الله عليه وسلم اما بعد اخواني واخواتي في الله انهارده اللقاء 15 باذن الله في دورة خطوه اولي التزام او في دورة موسوعة مشاكل الملتزمين او تفسير وتدبريات في سورة العنكبوت في مادة الليالي القرآنية قال الله تعالى **"ويستعجلونك بالعذاب"** يستعجلونك فعل مضارع يعني معناها طلب مستمر ضغط نفسي رهيب على النبي في ضغط نفسي رهيب علي الدعاه انتو قاعدين تقولوا القرآن القرآن طب القرآن بيقول ان اللي بيكدبوا هيتعذبوا ورونا بقي العذاب ايه ده! في انسان يقامر بمصيره! في انسان يوصل بيه يستهتر في مصيره لهذه الدرجة! **"ويستعجلونك بالعذاب"** شوف ربنا بيقول ايه **"ولولا أجل مسمي لجائهم العذاب"** ولولا اجل مسمي دا اسمه الامهال والحلم بردو يا جماعه ابوبكر الصديق لما النبي عليه الصلاه والسلام عقبه بن معيذ حاول يقتله في صحن الكعبه فابوبكر راح يدافع عن النبي فنهال عليه المشركين بالنعال والايدي فضلوا يضربوه لحد ما الدم غطي وجهه وضهره لحد ما بقي مش معروفه وش من ضهر محدش يعرف فين وشه وفين ضهره يعني مكان عينيه وبونه ومناخيره في الوش ولا في الضهر محدش عارف وابوبكر كلما ضرب يقول ربي ما احلمك ربي ما احلمك عارفين لما تشوفوا الظالمين قاعدين يفتروا على الملتزمين ويمنعوا المنتقيات من دخول الاماكن اللي من حقهم يدخلوها ويظلموا ويظلموا فانت تبص تقول ربي ما احلمك **"ولولا اجل مسمي لجائهم العذاب وليأتينهم بغتة وهم لا يشعرون"** **"يستعجلونك بالعذاب وان جهنم لمحيطه بالكافرين"** ايه ممكن تقطع قلبك علي مدي الغفله اللي هما فيها وممكن تخليك تضحك عليهم عاملين بالظبظ زي قوم لوط لما جاء اهل المدينة يستبشرون دا في شباب وهيقوا بقي في فعل اهل لوط ربنا بيقول بعدها **"وقضينا اليه ذلك الامر ان دابر هؤلاء مقطوع مصبحين"** الايه دي زلزلت قلبي لما قريتها اول مره اقرها واخذ بالي منها هما واقفين بيضحكوا وفي استغفر الله العظيم بقي قاعدين يتكلموا بالمصطلحات بتاعتهم ان في بقي حاجه كويسه وحاجه لذيه وحاجه ممتعه ولا يعلموا ان بينهم وبين الخلود في جهنم ساعات وان بينهم وبين الحميم وزنازين جهنم ساعات فيبقي منظر يفرعك من الغفله فربنا بيقولك **"يستعجلونك بالعذاب وان جهنم لمحيطه بالكافرين"** ربنا قادر عليهم ربنا قادر يحرقهم في لحظه ولكن لولا الاجل المسمي اللي ربنا قال قدره سبحانه وتعالى فدا قمة الغفله غفله رهيبه فتلاقي الولد ماشي بيقع في الزنا وهو مش عارف ان وهو مسافر الصبح على الطريق السريع هيموت في حادثه عربيه وهو مش عارف ان بينه وبين الموت ساعات فمنظر غفله مروع ان انسان مبيفكرش في الموت ولا يفكر في الحساب لدرجه انه بيرتكب جرائم وهو مش عارف ان الجرائم دي هيتحاسب عليها بعد ساعات محدوده المفروض يبقي حالته اشد من حالة اللي عارف ان عنده سرطان وان طبيا المفروض يموت بعد اسبوعين المفروض ان حالة ده اشد من حالة ده **"يوم يغشاهم العذاب"** فجأه الايه دي بقي تنقلك للاخر هو منظرهم في الدنيا الايات عملت ايه جابتلك في الاول منظرهم في الدنيا **"يستعجلونك بالعذاب"** منظر يحرق الدم وقالتك معلى دا هو وقت معين وهينتقم الله منهم وبعد كدا جابتلك مشهد غيبي **"يستعجلونك بالعذاب وان جهنم لمحيطه بالكافرين"** وبعد كدا نقلتك للاخره

**"يوم يغشاهم العذاب من فوقهم ومن تحت أرجلهم"** ليه يا جماعة العذاب من فوق ومن تحت كلام يفرع يا جماعة ان جهنم هاجمه عليهم من فوق ومن تحت ليه؟ ليه العذاب هيجي عليهم من فوقهم؟ لانهم لم يكونوا يتوجهون الي الأعلى لم يكونوا يتوجهون الي الله فيعاقبوا ان العذاب يجي من فوق لانهم لم يكونوا يتوجهون الي فوق طب ليه العذاب من تحت أرجلهم؟ لانهم كانوا يتوجهون الي المخلوق لما بيحصل حاجه مبيرفعوش ايدهم للأعلى كان لما بيحصل حاجة لا يرفعوا ايديهم لأعلى ويقولوا يارب كانوا بينزلوا للارض يطلبوا من الاوثان ومن الاصنام ومن البشر كانوا عبيد للارض فكما هبطوا للأسفل يجي لعذاب من أسفل وكما امتنعوا عن رفع أيديهم لأعلى يجي العذاب من أعلى **"يوم يغشاهم العذاب من فوقهم ومن تحت أرجلهم ويقول ذوقوا"** ربنا يقول لهم مش انتو بقي اعرضتم عني ذوقوا عاقبة اعراضكم عني بعد العذاب المادي عذاب نفسي العذاب النفسي ويقول ذوقوا ما كنتم تعملون مش بما كنتم تعملون ما كنتم تعملون جزاء هو العمل نفسه مفيش ظلم مفيش ذرة ظلم مفيش ظلم علي اد اجرامك علي اد العقوبة دي الرسالة الاخيرة قبل الهجرة علي قول ان سورة العنكبوت ان دي آخر آيات نزلت في مكة قبل الهجرة دي كانت الرسالة الاخيرة قبل الهجرة او الخطاب الاخير للمشركين اخر فرصة اخر فرصة يا جماعة خلاص فوقوا اللي بعده كدة أسود مما تتخلوا اللي بعد كدة افطع مما تتخلوا الحقوق لسة الباب متأفلش لأخلصت الفرصة وكانت الرسالة الاخيرة قبل الهجرة بعد كدة الرسائل الاخيرة للمؤمنين **"يا عبادي الذين امنوا ان ارضي واسعة فايبي فاعبدون"** باب الهجرة انفتح او عو تتكاسلوا او عو تتكاسلوا او عو ما تتضحوش يلا ضحوا يلا سيبوا وطنكم يلا اطلعوا فوق التهديد ان لو اتقبض عليكم في ابواب مكة هتسجنوا وهتقتلوا متخافوش من عزيمة انشاء واقع جديد في بلد جديد يلا اجرؤا يلا ان ارضي واسعة فايبي فاعبدون يلا اجرؤا يلا متخافوش يلا اجرؤا ملكوش حجة ان تقولوا يا رب معرفناش نعبدك ربنا ليه اصل انا الشلة بتاعتي كانت بتخليني اعصي ربنا ما عندك ميت شلة ملتزمة يا جماعة محدش ليه عذر ان ارضي واسعة ربنا بيقولها للجميع لكل شاب او بنت ماسكة في الشلة بتاعتها او بيقول في المكان مش عارف اطيع ربنا في اماكن تانية هتعرف تطيع ربنا خلي دينكو عالي عليكم زي ما وقفنا الاية دي وقفنا عليها المرة اللي فاتت علشان كدة ربنا قال ضحوا هاجرؤا ربنا قال لهم بعد كدة **"كل نفس ذائقة الموت"** يعني ايه؟ ايه اللي يخلي كل نفس ذائقة الموت بعد ان ارضي واسعة هتموت هتموت بس لما هتموت هتندم ندم رهيب انك ماخذتش قرارات تنقذ علاقتك بربنا لما هتموت هتندم كل نفس ذائقة الموت الموت جاي جاي الدنيا اللي ماسكين فيها والمصالح اللي خايفين عليها والوظائف اللي خايفين عليها والدنيا اللي خايفين عليها رايحة رايحة سايبكوا سايبكوا ده قدر حتمي لا مفر منه باسم الله القهار قهر البشر علي ترك الدنيا كل نفس ذائقة الموت نفوسكم اللي متحكمة فيكم اللي مخلصكوش قادرين تاخذوا قرارات التضحية هتموت هتموت ثم الينا ترجعون دي اللي اسمها خسائر ترك التضحية يعني ايه خسائر ترك التضحية اللي مش هيرضي يضحي علشان دينه هيندم ندم بعد ما يموت هيندم لما يلاقي الدنيا اللي مرضيش يضحي بيها هي اللي سابتته وفي النهاية ربنا هيسأله عملت ايه؟ عشت في الضلال ليه رضيت ان دينك يبقي ضايع ليه كل نفس ذائقة الموت ثم الينا ترجعون دي خسائر ترك التضحية **"والذين ءامنوا وعملوا الصالحات لنبؤنهم من الجنة غرفا"** دي ثواب التضحية دي مفاجاة كبيرة طول السورة بتقول ضحوا السورة بقول لازم تشتغلوا علشان الدعوة السورة بتقول ان الالتزام انك توقي مع دينك في ازماته الظروف متعطليكش عن دينك زي العربية اللي ماشية في طريق لما بتلاقي مطب بتهدى مش بتقف لو العربية وقفت تبقي مش صادقة مش عايزه توصل بتهدى ولما المطب بيعدي بتقوم منطلقه تاني ودايسه بنزين تاني اهو كدا انت في الطريق الي الله لما بتلاقي مطب او اعاقه بتهدى لما بييجيك امتحان لما بيحصلك ظروف بتهدى وبعد كدا تدوس بنزين تاني لكن مبتوقفش العربية اللي بتوقف في اول مطب عمرها ما بتوصل في طريقها طيب اللي رضوا انهم ينطلقوا في طريق الدين اللي رضوا انهم يضحوا **"الذين امنوا وعملوا الصالحات"** اللي

طبقوا منهج سورة العنكبوت اللي انا شايف ان الملتزم الجديد اللي ميدرسش سورة العنكبوت سيدفعوا الثمن فادح لعدم فهم بصائر هذه السوره في بداية الطريق الي الله **"الذين امنوا وعملوا الصالحات لنبؤنهم من الجنة غرفا"** اللي بيمسك عرش الملك بيبقي تبوء الملك يعني لنبؤنهم من الجنة يعني كمان مش الجنة دا جزء من الجنة **"غرفا"** الغرف اللي هي الفردوس الأعلى **"لنؤنهم من الجنة غرفا"** لنؤنهم اللي بيمسك الملك بيبقي تبوء الملك يعني لنؤنهم من الجنة غرفا من الجنة دا كمان يعني جزء من الجنة غرفا الغرف اللي هي غرف الفردوس الأعلى ياجماعه طلع ثواب التضحية الفردوس الأعلى مش الجنة بس مش النعيم بس الفردوس الأعلى يعني اللي هي قبل منهج سورة العنكبوت اللي هي قبل منهج دين ابو بكر وعمر اللي هي قبل منهج التضحية علشان الدين اللي هي قبل تحمل المسئولية والرسالة اللي هي قبل الدين ثوابه ايه **"لنؤنهم من الجنة غرفا"** دا جزء كمان دا غير باقي النعيم المهول انما هكشفلكوا حته كده من الستارة انتو عارفين كده ايه مثلا لما يبقي في برنامج حلو هيحي في رمضان الدعيه بتاع البرنامج يكشف دقيقه واحده من البرنامج للناس يقولهم اقولكم بس دقيقه من البرنامج أو علشان اشوقكم فربنا بس يقول اكشفلكوا حته من الجنة بتاعتكوا غرفا الغرف اللي هي أعلى الفردوس الأعلى يعني الفردوس الأعلى ده جزء يارب دا النعيم بتاعنا هيبي ايه **"لنؤنهم من الجنة غرفا تجري من تحتها الانهار خالدين فيها"** شوفوا يا جماعه يعني الاتنين نار من فوقهم ومن تحتهم من فوقهم ومن تحت ودا عذاب من فوق ومن تحت والعياذ بالله والعياذ بالله **"نعم اجر العاملين"** نعم اجر العاملين كلمه تعجبية يعني اسلوب لغوي بلاغي تعجبي اللي خلق النعيم يتعجب منه انت فاهم المعني اللي خلق نعيمك في الجنة يتعجب من نعيمك في الجنة نعم اجر العاملين نعم اجر المضحين نعم اجر المجتهدين في الدعوة الي الله ثواب الدين اللي بحق وحقيقي مش ثواب الدين اللي علي المزاج الدين اللي بيتحكم فيه مشاعرنا جت ولا مجتش الدين ده ثواب دين الدعوة دين التربية دين العبادة دين القوة دين بينه الايمان دين الثبات أمام تهديدات أهل الباطل يبقي ربنا سبحانه وتعالى الرساله الاخيره الهجرة يلاخد قرار هتموتوا هتسيبوا الدنيا هتسيبوا الدنيا سيبوا علشان ربنا قبل ما تسيبوا غصب عنكم واللي هي سبها هياخد الفردوس الأعلى ثم ياتي الجزء الختامي في السورة **"الذين صبروا وعلي ربهم يتوكلون"** مين اللي ليهم الثواب ده! الذين صبروا صبروا علي ايه؟ صبروا عالدعوة صبروا علي بينه الايمان صبروا علي تهديدات أهل الباطل وعلي ربهم يتوكلون ان الدين هينتصر ويبذلوا كمان علشان الدين ينتصر نقدر ياجماعه نبقي من الذين صبروا وعلي ربهم يتوكلون بعد كده نيجي للختامه بتاعه السورة بعد الرساله الاخيره للمشركين والرساله الاخيره للمؤمنين **"وكأين من دابه لا تحمل رزقها الله يرزقها واياكم"** الخاتمه من ايه 60 لايه 68 دي الخاتمه اللي احنا هناخدنا دلوقتي بعد كده ايه 69 عاوزة لقاء منفصل ليها خالص بقي ان شاء الله **"والذين جاهدوا فينا لنهدينهم سبلنا"** اعظم قاعده للوصول الي الله دي ان شاء الله ليها لقاء منفصل احنا هناخد دلوقتي من 60 ل68 دا يا جماعه ايه اسمها المعوقات الداخليه في الطريق الي الله احنا قولنا سورة العنكبوت مقسومه نصين نص بتتكلم عن المعوقات الخارجييه في الطريق الي الله اللي هي امك وابوك هيقفوا في وشك هيجيلك بقي ناس تهددك وأصحابك هيحاولوا يرجعوك وكل دي بقي وأهل الباطل بقي والاسباب كل دي المعوقات الخارجييه اللي هتقف في طريق دينك والتزامك وانطلاقك الي الله هنا بقي المعوقات الداخليه اللي هتقف في طريقك الي الله يعني ايه المعوقات الداخليه يعني واجه نفسك يعني الاسباب اللي تخلي الملتزم فجأه منهار وساب الالتزام والكل يستغرب هو ساب الالتزام ليه هو بقي مفيش حد هددوا هو ساب الالتزام ليه هو ايه اللي حصل؟ هتلاقي الاخ انتكس هتلاقي الاخت سابت الطريق طب سابت الطريق ليه بيحصل كثير يا جماعه السبب محدش يعرفه غيره محدش يعرفه غيرها علشان كده المنهج اللي هناخد منهج واجه نفسك منهج الصدق الفرق بينا وبين الصحابه انهم كانوا صادقين الصحابه لما كان يبقي

عندهم مرض كان بيواجه نفسه حنظله كان يقول نافع حنظله محدش فينا يقول نافع فلان مفيش واحدة في الدنيا بتقول نافقت فلانه محدش راضي يواجه نفسه المرأه اللي جت للنبي عليه الصلاه والسلام بتقوله طهرني يا رسول الله انا انسانه مش نضيفه انا انسانه مش طاهرة انا انسانه عايزة اطهر طهرني يا رسول الله احنا مفيش حد فينا بيواجه نفسه قدام الدنيا بهذة الحقيقه محدش فينا عنده الجراة انه يعلن ان هو مريض او حتي قدام نفسه يعلن ان هو مريض ويواجه نفسه بالحقيقه ويبدأ

كلنا بنهرب كلنا بننخدع بمزاجنا بثناء الناس علينا واحنا عارفين ان احنا بعاد وعارفين ان احنا وحشين وعارفين ان احنا مقصرين وكل واحد فينا عارف كام فجر راح عليه وكام ليله راحت من غير قيام وكام يوم راح من غير صيام وكام وكام وكام وكام وكام وكام وكام وكام وكام قلبه والبلاوي اللي جوه قلبه ومعاصي السر اللي بيوقع فيها وطموحاته الدنيوية اللي واكله قلبه ورغباته النفسية اللي بعيده عن مراد الله ، كل واحد عارف نفسه كويس جدا **ياجماعه "ونعلم ما توسوس به نفسه"** كل واحد فينا عارف كويس جدا هو وحش قد ايه!! ولكن محدش راضي يواجه نفسه الصحابه واجهو نفسهم لأنهم كانوا صادقين انهم عايزين يوصلوا احنا ما بنواجهش نفسنا لأننا مش صادقين اننا عايزين نوصل فدلوقتي المعوقات الداخلية اللي هي المفروض ان الصادق يواجه نفسه بيها ايه المعوقات الداخليه دي نقول الأول ترتيب الآيات لأن الترتيب ده بديع جدا زي خاتمة سورة النمل كده ( آية دنيا .. آية آخرة ) تحس احساس السونة ان آية تدخلك الدنيا وبعد كده تصدمك بالآخرة وبعد كده آية ترجعك الدنيا وهكذا... فشوفو يا جماعه **"وكأين من دابة لا تحمل رزقها" آية بتتكلم عن الرزق** وبعدها **"ولئن سألتهم من خلق السموات والأرض" بتتكلم عن التوحيد** يبقى رزق .. توحيد بعدها **"الله يبسط الرزق" الطموحات الدنيوية** لأن هنا رزق البسط مش أي رزق ، ، الناس اللي عايزه تبقى باشاوات يعني الملتزم له حق أنه يطمح في الدنيا بس مش من حقه ان الطموحات دي تخليه يبعد عن الدين ويفر من الدين زي أهل الشهوات خافوا على طموحاتهم من الدين ففروا من قسورة حسبو ان الدين هيقهرهم فهربو منه زي الحمر الوحشية لما بتهرب من الأسد في الغابة بعد كده **"ولئن سألتهم من نزل من السماء ماء" آية توحيد** يبقى آية رزق .. آية توحيد آية رزق وطموحات دنيوية .. آية توحيد بعد كده **"وما هذه الحياة الدنيا إلا لهو ولعب" بعدها "فإذا ركبوا في الفلك دعوا الله مخلصين له الدين"** مشهد من أعظم مشاهد التوحيد اللي تزلزل القلب توصل الإنسان إلى الله ساعة الكرب وإن الإنسان ساعة الكرب مايبلاقيش غير ربنا يفرع إليه يبقى آية رزق .. آية توحيد آية رزق وطموحات دنيوية .. آية توحيد آية محبوبات دنيوية .. آية توحيد بعد كده **"أولم يروا" آية تعجب** هم لسه مش عايزين يفتحوا الواحد فعلا لما بيروح مكة بيعجب من نعم ربنا على هذه البلد حتى من أيام الجاهلية **"أولم يروا أننا جعلنا حرمًا آمنًا ويتخطف الناس من حولهم" خايفين، يقولو إن نتبع الهدي معك نتخطف من أرضنا ده انتو ربنا جعلكم للكره الأرضية آية في الأمن** وخايفين بعد كل الآيات دي يبقى كده آية أمن وبعد كده **"ومن أظلم ممن افترى على الله كذبًا"** أعظم جريمة في حق الله يبقى آية توحيد يبقى ياجماعه نسق مذل ، نسق خاتمة سورة العنكبوت فعلا كلام الله يا جماعه ، كلام اللي خلق النفسيات كلام اللي يعلم ازاي نوصله القرآن يا جماع ، هناك فارق بين إنك تتربى على إيد مخلوق وإنك تتربى بالخالق ، لأن الخالق هو اللي يربيك هو ده القرآن .. تربية الخالق للمخلوق يبقى آية رزق .. آية توحيد آية رزق وطموحات دنيوية .. آية توحيد آية محبوبات دنيوية .. آية توحيد آية أمن .. آية توحيد

ده نخرج منه بنقطين خطيرتين جدًا

"1" إن كل المعوقات الداخلية اتربطت بالتوحيد هي دي المعوقات الداخلية الثلاثة أو الأربعة يعني ممكن نخليهم تلاته أو اربعة رقم واحد هم الرزق .. هم الكفاية أكل منين واشرب منين ولو اشتغلت في الدعوة وأهل الباطل حاربوني في وقت المنتقبات ممنوعات من دخول الجامعة بعد ما طلعو



الأوائل على الدفعه وطلع عندهم في المذاكرة وفي الآخر ممنوع يعني إيه ممنوع !! ده قانون ده ولا شرع ده ولا إيه ده مش حاجه ده قدره، يعني ايه قدره يعني ياكلو منين ومصاريفهم هو كده، هو الموضوع كده فيقول لك انت خايف على رزقي فده هم الكفاية في الرزق النوع الثاني "الله **يبسط الرزق**" هم الطموحات الدنيوية واحدة تقول طب انا منتقبة وبطلع الأولى كمان خمس سنين مثلا مش هعرف اتعين فتبدأ تخاف، واحد ملتزم يخاف طب أنا كده مش هتعين طب مش هتوظف طب محدش هيرضى يشغلني في الشركات .. ده هم الطموحات الدنيوية وده تاني معوق داخلي وهو نوع من الرزق بس الأول رزق الكفاية إنما ده رزق البسط أنا عايز أبقى مليونير أنا عامل حسابي أبقى تاجر وأسافر بره وأخذ جنسية الإلتزام ممكن يقيدني .. مش هيقيدك، مش هيقيدك بالعكس هيملاً حياتك بركه، ده الدنيا هيبقى سبب نجاحك

إذا المعوق الأول هو الرزق، المعوق الثاني هم البسط في الرزق وهم الطموحات الدنيوية المعوق الثالث "وما هذه الحياة الدنيا" هم المحبوبات أنا بحب واحدة لو التزمت هسيبها،، أنا متعلقة بشاب لو التزمت معناه إني أسيبه،، أنا في حاجة في الدنيا بحبها وانتو ممكن تقولولي حرام طب أنا أعمل ايه ده هم المحبوبات الدنيوية المعوق الرابع "أنا جعلنا حراماً آمناً ويتخطف الناس من حولهم" هم الأمن أنا دلوقتي كده هبقى مهدد وشغلي في الدعوة في الجامعة وشغلي في الدعوة في كل مكان هيخليني مهدد، طب أنا أعمل ايه .. ده هم الأمن

يبقى دي الحاجات اللي فعلياً بتكون معوقات داخلية يعني الشاب يبجي يلتحي، بقى شكلك وحش ومفيش واحده هتبص لك دي محبوبات دنيوية ياعم هيراقبوك وهيعملوك ملف ده الأمن يا عم محدش هيرضى يشغلك ده الرزق

يا عم ليه تقفل حياتك، ما تنطق وتعيش حياتك وتشوف طموحاتك ديه الطموحات الدنيوية يبقى ديه فعلاً معوقات داخلية بتحتدم داخل نفوس كثير من الملتزمين والملتزمات يعني سبحان الله كلمة ابن مسعود الخطيرة لما ربنا قال بعد هزيمة أحد "منكم من يريد الدنيا ومنكم من يريد الآخرة" قال: ما كنت أظن أن فينا أحدا يريد الدنيا حتى نزلت هذه الآية فيه ملتزمين كثير أطهار من هذه الخواطر النفسية وهذه المعوقات الداخلية مش معنى كده يا جماعة إن احنا ننكر وجودها ديه موجوده 90% من الملتزمين والملتزمات جواهم يبقى لازم نعالجها طب ربنا عالجه إزاي؟ بعد كل معوق داخلي ربنا تكلم عن التوحيد يعني انت عارف، أنا عندي صدادع .. خد اسبرين طب أنا سخن .. خد اسبرين،، طب أنا دايع .. خد اسبرين فيه إيه هو بتاع كل حاجه؟؟ أيوه هو بتاع كل حاجه

دواء واحد في جميع الأمراض اللي هو التوحيد يبقى كلمة التوحيد دي كلمة كبيره جدا، يبقى التوحيد ده مش كتاب عقيدة 70 صفحه، الأخ بيدرسه، الكتب دي اسمها ضوابط العقيدة إنما دي مش العقيدة العقيدة هي الكلام ده العقيدة ان انت لما تهدد بسبب دينك، تقول لن يضرنني أحد وربنا معايا العقيدة إنك ما تخافش على رزقك وانت مع الرزاق العقيدة انك ما تخافش على طموحاتك الدنيوية وانت مع من يملك النفع والضرر وتقول ربنا هو اللي هينجحنني في طموحاتي الدنيوية، هي دي العقيدة يا جماعة العقيدة مش إني اسمع شوية ضوابط، دي اسمها ضوابط، دي السور بتاع الفيلا اللي بيجمينا ان حرامي ينط فيها يسرقها، إنما الفيلا نفسها بقى هي دي العقيدة (الاعتقاد الحقيقي) هو ده الكلام الحقيقي كنت بشرح درس للإخوه الفجر في دورة أصحاب الكهف "فأوو إلى الكهف ينشر لكم ربكم من رحمته ويهيء لكم من أمركم مرفقاً" قلت لهم هي دي العقيدة إن أنا أبقى واثق إن ربنا لن يتخلى عني ولا يمكن يسبيني، يقين راسخ ويقين جازم يبقى ربط كل شيء بالتوحيد، فالتوحيد ده علاج للشهوة زمان وأنا طالب الشيخ محمد يعقوب -ربنا يبارك في دعوته ويحفظه- إدانا سلسلة دروس اسمها

كيف تواجه الشهوة بالتوحيد أنا استغربت أوي أوي ومافهمتش الدروس وقعدت سنين أسأل مال الشهوة بالتوحيد! فخاتمة العنكبوت فهمتني العلاقة إن المخاوف اللي جواكي هتعالج بالتوحيد الأمراض اللي جواكي هتعالج بالتوحيد

إن كل مشاكل حياتك ممكن تتعالج بالتوحيد التوحيد يا جماعة ،، التوحيد ده أنك أصبحت واحد لإله واحد على طريق واحد وحدث كل جهدك وهمك على مقصد واحد فربنا ريحك قلبك ماعدش قلبك متمزق مايبين ألف رغبة ورغبة الإنسان الي وحد همه على الله، الله كفاه كل شيء التوحيد ده له معنى مهول، معنى جبار وانت بتقولني في جلسة الضحى (لا إله إلا الله وحده) وحده دي سكينه بتدبح كل ما سوى الله من القلب، والواحد يقولها كده

تحس إنها سكينه بتدبح المخاوف والمحوبات والمرجوات بتدبح كل ما سوى الله من القلب فلا تدع في القلب سوى الله (لا إله إلا الله وحده) يبقى إذا ده التوحيد دي العقيدة العملية والتوحيد العملي يبقى في أربع أبواب اللي ما درسهمش مدارسش توحيد عملي إيه هم الأربع أبواب :

1- توحيد الرزق، لازم ندرس ماده كده اسمها توحيد الرزق نجيب آيات الرزق ونجمعها ونجمع شروحها وكل ملتزم وملتزمه يدرسها

2- توحيد النفع والضرر اللي هي الطموحات الدنيوية، إنك تعرف إن كل رغباتك وأحلامك في إيد ربنا وحده مش ادي ربنا شهري عشان أحقق طموحي يبقى أنا كده مش مصدق إن طموحاتي في إيد ربنا .يبقى توحيد النفع والضرر نجمع كل آيات النفع والضرر والفتح والنصر والمدد في القرآن عشان نفهم إن كل ده بايد ربنا

3- توحيد الأمن إن احنا نعرف "**فأي الفريقين أحق بالأمن**" إن احنا نعرف إن مصدر الأمن هو الله نجمع كل آيات الأمن في القرآن وتبقى بحث يدرسه كل ملتزم وملتزمه

4- توحيد نوال المحوبات يعني الشاب اللي ماشي مع بنت توقفه ف الشارع، وانت توقفيها وتقولني لها الشاب ده مش في إيد نفسه ولا في إيد أبوه الشاب ده في إيد ربنا مش هتاخديه من خزائن ربنا غصباً على اللي خلقه البنت ديه مش في إيد أبوها ولا في إيد نفسها البنت ديه في إيد ربنا، مش هتاخدها من خزائن ربنا غصب عن اللي خلقها

سبحان الله والله المثل الأعلى توحيد نوال المحوبات إن كل حاجه نفسك فيها بإيد الله وحده لو انت طلبتها من الله ربنا هيجيبها لك لو فيها خير ولو طلبتها بغير الله هتعيش معذب بيها "**لمسكم فيما أخذتم**" ربنا هيعذبك بالحاجة اللي انت حبتها من دون الله سبحانه وتعالى من الدقيقه سابعه وعشرين لحد ثلاثين كلام عن الابحاث

يبقى فمربي الورش يجبرهم انهم يمسكوا تكاليف الابحاث خلاص ياجماعه فانتو بإذن الله مبدنيا خدتوا ٤ أبحاث هتجوبوها وإن شاء الله عشان يبقى ختامها مسك معلش كده ٣دقائق كده بس هنكمل بسرعه الآيات عشان يبقي معندناش غير الآيه ٦٩ "**والذين جاهدوا فينا لنهدينهم سبلنا وإن الله**

**لمع المحسنين**" وكأين من دابة لاتحمل رزقها الله يرزقها واياكم وهو السميع العليم، لاتحمل رزقها معناها ان ملايين من الانواع من الكائنات مش بتخزن رزقها ومش بتروح بكيس أكل تعينه تفطر بيه تاني يوم الصبح فربنا يقول انظروا للكائنات التي لاتخزن الاكل اصلا ومش عندها تلاجت تخزن فيها أكل، وربنا كل يوم بيبعتلنا رزق الكفايه صدقوا ان ربنا كل يوم بيبعتلكوا كل يوم رزق الكفايه عشان في الاخر وهو السميع العليم ارفعي ايدك وقولي يارب عريس ارفع ايدك يارب شقة يارب عروسه اتجوزها، يارب شغلانه يارب ارزقني وشوف ربنا هيعملكوا ايه وهو السميع العليم، بعدها "**ولئن سألتهم من خلق السموات والارض وسخر الشمس والقمر ليقولن الله فأنى يؤفكون**"

ليه آية سخر الشمس والقمر بعد رزق الكفايه لان رزق الكفايه عامل زي الشمس والقمر هي الشمس بتطلع على الأغنياء مش على الفقراء وهو القمر بيجي للأغنيه مش للفقراء ،هو القمر بيجي للبنت الجميله قوي ومش بيجي للبنت المقبوله مش في نفس درجة البنت الجميله، زي ما رزق الشمس والقمر بيجي للدنيا كلها رزق الكفايه بيجي للدنيا كلها، هيبعت لكل واحده عريس بس

هي تتوكل علي الله وهيبعت لكل واحد عروسه وشقه بس يتوكل علي الله رزق الكفايه كرزق الشمس والقمر بس لازم تؤمنوا ان ده ربنا هيديه للجميع بس هما يفهموا، بعد كده **"الله يبسط الرزق لمن يشاء من عباده ويقدر له إنه الله بكل شئ عليم"** دي آية الطموحات الدنيويه اللي مش عاوز رزق الكفايه انا عايز ابقى غني انا عايز ابقى عظيم فجت آية الله يبسط الرزق لمن يشاء من يشاء من عباده، عباده دي يعني الصالحين اللي بيعبدوه يعني اعظم سبب في البسط هو العباده، نقوم نسيب العباده عشان الطموحات الدنيويه دا ربنا هيفتح عليك بسبب العباده ويقدر له ربنا يقول ويقدر له يعني لأجلك لمصلحتك، يا أيها الصالح لو لقيت باب من أبواب الدنيا نفسك تاخده لقيته مقبول قدامك أعرف ان ده لمصلحتك، اعرف ان دلوقتي مش من مصلحتك انه يفتتح، او مش من مصلحتك خالص، اعرف ان ربنا بيرتبك اد ايه، ويدبر لك اد ايه فثق في الله، وبعبادتك هتاخذ اضعاف اللي اللي صاحب الدنيا بسعيه الدنيوي هياخده بس بدون مايكون ربنا معاه، عشان كده في آخر الآيه إن الله بكل شئ عليم ربنا عالم مصلحتك فين انت ممكن هتموت علي حاجه وهي مش من مصلحتك، وربنا يعلم انت صالح ولا مش صالح فيفتح عليك علي قد صلاحك، فثق إنه بكل شئ عليم، عشان كده آية الطموحات الدنيويه أولها آيه الله يبسط الرزق لمن يشاء من عباده ليه اسم الجلاله في الاول عشان قلبك يتعلق بالله في هذه الطموحات، بعدها ولئن سألتهم من نزل من السماء ماء فأحيا به الارض بعد موتها ليقولن الله قل الحمد لله بل أكثرهم لايعقلون، يبقي هنا اشمعنا السحاب والمطر لأن رزق البسط عامل زي السحاب والمطر، السحاب والمطر مش بيروح لكل الدول، ربنا بيختار ناس دون ناس، ربنا قال رزق الكفايه كرزق الشمس والقمر للجميع اما رزق البسط فهو كرزق السحاب والمطر، ربنا بيختار ناس معينه ليه فأنت عايز ربنا يشارك عبده، زي البلد اللي عايزه الدنيا تشتي بتصلي صلاة الاستسقاء، انت عيش حياتك بافتقار الاستسقاء بقي ان ربنا يعطيك ويمن عليك، عشان كده ربنا في آخر الآيه يقول قل الحمد لله بل أكثرهم لايعقلون، يعني ايه؟ يعني لايعقلون هذه الحجج الدامغه العظيمه بيصوا للسحاب والمطر مش بيخرجوا بحاجه دا اللي احنا بنسميه التدبير المثمر الواعي ازاى نبص للسحاب والمطر نخرج بيها بحكم في حياتنا، زي ماربنا علمنا ان الشمس والقمر للجميع هيرزق الجميع عايزين تدبر واعي نفسي نروح جلسة تدبر نروح هناك ن فكر الإله العظيم ده يستاهل اننا نعمل ايه، نتدبر تدبر واعي، اللي يبص في الكون يفهم حكم جباره بس مين اللي يفهم تدبر واعي احنا أميين عندنا أميه تدبريه مش قادرين نستخلص من الكون الحكمة التي وراء هذا الكون العظيم عشان كده قل الحمد لله، يعني ايه الحمد لله، الحمد لله علي الحجج الدامغه بتاعة ربنا، الحمد لله ان ربنا بي فهمنا علي رأي واحد صاحبنا ليه الحمد لله يارب عشان رب العالمين عشان الرحمن الرحيم عشان مالك يوم الدين، كان ممكن يقولنا الحمد لله، كده وخلص لكن ربنا بي فهمنا الحجج الدامغه وعلي انه فاهمنا بل أكثرهم لايعقلون، **"وما هذه الحياة الدنيا إلا لهو ولعب"** يعني جدها لعب، وهزلها لهو، وما إلا هي الدنيا مفيهاش غير كده، وإن الدار الآخرة لهي الحيوان لو كانوا يعلمون يعني ايه الحيوان ياجماعه الحيوان كلمه خطيره تشوقنا للجنة وتلهفنا ليها، المعني الاول الحيوان علي وزن الفعلان، والفعلان ده من صيغ الحركة الفجة في اللغة الغليان اللهفان الفوران يعني لما يكون في حركه رهيبه يجبولها حاجه علي وزن فعلان يعني الجنه مليانه حركه مليانه حياه، زي الطفل وهو جنين في بطن امه نقوله اخرج للدنيا يقول لأ، ليه انا كنت في بطن امي مستريح وبتحرك وبتنطط وبتحرك ايدي ورجلي، طب لما يخرج للدنيا يبقي عنده ٣٠ سنه، نقوله تعالي ارجع لبطن امك تاني يقول حرام عليكم متدفنوني بالحياء، اهو بالضبط كده نيحي نقول يلا ننطلق للأخره لأه، الآخره منعرفش فيها ايه دا قبر ضلمه ومقفول، يا ابني انت لما تروح الآخره ونيحي نقولك تعالي ارجع للدنيا هتقول حرام عليك ارجع لارض الخنقه والدفنه بالحياء تاني ليه، يبقي لهي الحيوان معناها ان الاخره مليانه حياه ونعيم جبار، تاني حاجه الشاب اللي هو رايح يتفسح اخره فين راس البر ولا جمصه ولو هو شاب روش ولا كول هيطلع الساحل الشمالي ولا شرم الشيخ، إنما بعض المفسرين

يقولوا ان اول رحله بس في الجنه في قول الله جل وعلا تلك الجنه التي أورثتموها، المسافه اللي بيقطوعها عشان يشوفوا املاكهم بتستغرق ١٠٠٠ سنه رحله ياجماعه حركه بحق وحقيقي، حياه بحق وحقيقي، عشان كده لما تشوف طفل قاعد يتحرك ويتنطط ليه سعيد معنوش مشاكل معنوش هموم ، امال احنا مبتحركش ليه لان دي هموم الدنيا شلتنا وقعدتنا ومعناها ان مليانه سعادته فبتتحرك كثير لأن احنا سعداء من رحله لرحله. ومعناها ان مليانه متع جبارة مش 3 ساعات لإسكندريه ويبقا إسمننا اتفسحنا! متع جبارة المعنى الثاني بردو للحيوان إن صفة الفعلان بتيجي بردو لما تكون بتفيد العمق في الصفة ازاى؟ يقولك في فرق بين الموت والموتان، الموتان ده يعني مات وشبع موت. فالحيوان يعني الحياه الكامله العميقه الحقيقيه. يعني ايه؟ يعني هاتقولي مثلا حله مثلا مشويات مثلا او طبق مشويات انا هاحط الحته المشويات في بوقي بعد 3 ثواني الطعم هايروح من بوقي. ليه؟ هو على السريع. الدنيا دي تخطف الدنيا دي .. الجماع نص دقيقه ولا دقيقه ولا 5 دقائق ولا نص ساعه ايه يعني الجماع، على رأي الشيخ نشأت زمان كان يقول يعني الجماع لذته الحقيقيه أد ايه في الاخر، اللي هو بقا لحظه اللذة الحقيقيه أد ايه؟ ياجماعه الدنيا دي لذتها تخاطيف تخاطيبييف انما الجنه بقا، الجنه، احنا خدنا في كتاب العظيمنتان في آيه من الآيات إن طعم الثمرة، طعم الثمرة بيظل في الفم أد ايه بعدها، بيظل في الفم مده طويله بعدها عشان كده **"وإن الدار الآخرة لهي الحيوان"** هي دي الحياه الحقيقيه الكامله اللي مليانه حركه وحياه **"لو كانوا يعلمون"** وبعد كده **"وإذا ركبو في الفلك يدعو الله مخلصين له الدين"** مشهد من اخطر مشاهد التوحيد في الحياه . مشهد ساعه ما الانسان بيوقع في أزمه ويخلع قناع الكبر اللي على وشه ويرفع ايده زي الشحات ويترسوم على وشه الذل والإفطار ويقول يااارب أعثني يارب. مشهد من أعظم مشاهد التوحيد اللي بتوقظ الفطره. بعد كده **"أولم يروا أنا جعلنا حرما آمنا ويتخطف الناس من حولهم"** الأمن بقا، الوقوف على الأمن **"أفبالباطل يؤمنون وبنعمة الله يكفرون"** ايه الباطل؟ الباطل هو حفظ الأوثان وحفظ البشر للبشر. ربنا بيقولهم ده باطل مفيش حد يقدر يحميك مفيش حد يقدر يأمنك .الله بس اللي بيايده الامن **"وبنعمة الله يكفرون"** ايه نعمة الله؟ الأمن اللي انتو غرقانين فيه يا اهل مكه. بيبقا تصدقوا ان شويه الاصنام دول وشويه البشر دول يقدروا يحموكوا وربنا الحفيظ مش مصدقين انه يقدر يحميكوا !!! افاطل، عقيدته ان الاوثان تقدر تحميهم **"أفبالباطل يؤمنون وبنعمة الله يكفرون"** وبنعمة ربنا اللي حاسينها وذايقينها وعاشينها بيكفروا بيها فتيجي الآيه الأخيرة بقا في الخاتمه **"ومن أظلم ممن افترى على الله كذبا او كذب بالحق لما جاءه أليس في جهنم مثوى للكافرين"** ومن اظلم ممن افترى ايه؟ على الله، على الله. شاب من الشباب وأنا داخل في البث المباشر على اليوتيوب الاسبوع اللي فات فلقيت شاب كاتب على الفيس كده كاتب على صفحه من الصفحات بيقول: انا لما هاخطب بنت مش هابقي خنيق ومش هاقولها متلبسش بنطلونات ومش هاقولها شيلي بقا صحابك اللي عندك على الفيس دول ومش هاقولها اتعبي في الحجاب ومش هاقولها ومش هاقولها ومش هاقولها .. أنا بس هاقولها احترميني لازم تحترميني. قولت يااااه على إجرام الانسان، يعني انت اهم حاجه عندك مش انها تحترم ربنا وتحترم شرع ربنا اهم حاجه انها تحترمك انت!! اهي دي **"ومن اظلم ممن افترى على الله"** ابشع جريمه ان الجريمه تبقا في التوحيد. ان الجريمه تبقا في حق الخالق مش المخلوق. عشان كده ياجماعه ممكن واحد يتجرح جرح 30 سم في رجليه يروح يتخيظ ثلاثين اربعين غرزة ويعيش وواحد يتجرح جرح نص سم بس في قلبه او في مخه يموت بيبقا العقيدة هي عامله زي القلب والمخ كده لا تحتمل جرح صغير انما باقي الدنيا ممكن ينجرح فيها الانسان ويكمل ويعيش ودي **"ومن اظلم ممن افترى على الله كذبا"** ابشع جريمه ان الجريمه في حق التوحيد ان الجريمه تبقا في حق الله . **"او كذب بالحق لما جاءه أليس في جهنم مثوى للكافرين"** أليس في جهنم مثوى، مثوى بقا مكان بقا يمكثوا فيه ويبقا مثواهم والعياذ بالله. كده ياشباب- ربنا يبارك فيكم - كده عاوزين نقول شبه الف مبروك خلصنا بفضل الملك 68 آيه من سورة العنكبوت ماعادش غير آيه واحده بس ماعادش غير **"والذين"**



**جاهدوا فينا لنهدينهم سبلنا وإن الله لمع المحسنين** " ما عايش غير الآيه التي ربنا يقولك جاهدي ،  
التربية دي جهاد ، جاهدي في بناء نفسك ، الجهاد هنا في سورة مكيه يعني جهاد نفس يعني  
التربية دي مجاهده. اتعبو (فينا) في سبيل الله (لنهدينهم) ربنا بيقسم انه هايهديكي وهايوصلك.  
ومش لنهدينهم سبيلنا -سبلنا- هايفتحك الف طريق يوصلك لربنا **"وإن الله لمع المحسنين"** وعد  
من الله بالمعيه للي هايحسن في الطريق الى الله.

هو انا باشرح الايه دي ليه. الآيه دي انا هاوقف معاها درس لوحدنا كامل ان شاء الله ياجماعه انا  
بشرحها بس عشان لو الواحد مات يبقى اسمنا تمننا سورة العنكبوت وخلصناها بإذن الله سبحانه  
وتعالى. يعني وإن يسر الله نقف مع هذه الآيه بقا وقفه كامله كده 15 مجلس في سورة العنكبوت  
عايزيين ان شاء الله بإذن الله يعني تفريغاتهم تبقى كامله عشان ان شاء الله هانقف معاكو بقا ايه  
سهرة سهرتين كده مع بعض ان شاء الله مع سورة العنكبوت نلما مع بعض ونعيش فيها مع  
بعض ونفهم ايه فكرة ماده الليالي القرآنيه اصلا اللي احنا درسنا فيها مادة العنكبوت بحيث ان احنا  
ان شاء الله بإذن الله ماتفقدش الفوائد الجمه اللي ربنا فتح علينا فيها في هذه السورة ربنا يحفظكم  
ويبارك فيكم متنسوش الأبحاث اللي انا كلفتكوا بيها ان شاء الله، انواع التوحيد العملي الاربعه ان  
شاء الله بإذن الله هايكون عليها امتحان، هاقولكو ان شاء الله بإذن الله، اه طبعا غالبا هايكون في  
اختبار على سورة العنكبوت يعني غالبا بإذن الله سبحانه وتعالى انما فكرة سكتن لسورة العنكبوت  
هي اللي احنا دلوقتي بندرس ان احنا مانعملهاش سكتن يعني مانزودش الاحمال عليكم ويبقا بس  
ممكن سهرتين كده مراجعه فيها بإذن الله سبحانه وتعالى انما الله اعلم يعني الوضع هايبقى ايه.  
ربنا يبارك فيكم الأبحاث للأسماء التي عرضت فقط. اختنا رميصاء. الأبحاث الاسماء اللي عرضت  
ده كلام مبدئي انما الشيخ احمد طاهر في سكتن السبب بإذن الله هايكلف منكوا زياده بهذه الأبحاث.  
خلاص ياجماعه هايكلف منكوا زياده بهذه الأبحاث عشان مييقاش في حاجه اسمها طالبه ملتشتغلش  
عارفين ان مادة مربى الورش الزاميه في الحضور عليها حضور وغياب الحضور نفسه عليه  
درجات وربنا يسددكوا ويبارك فيكم سعدنا بصحبتكم في هذه الليله ربنا يستعملكم ولا يستبدلكم  
تم بحمد الله

**شاهدوا الدرس للنشر على النت في قسم تفريغ الدروس في منتديات الطريق إلى الله وتفضلوا هنا:**

<http://forums.way2allah.com/forumdisplay.php?f=36>